

ХАНТЫ ЯСАҢ

6 апреля 2017 года

№ 7 (3475)

www.khanty-yasang.ru

Основана 1 ноября 1957 года

Русскинской кэртән шуши ёх а́кта́щийлсәт



В. Енов верум хур

Юхи хәшум олатн Алексей Рускин рўтышуман вәнт кэртәлдн вәд. Ай кер тыдәш 18-мит хәтәлдн йисәңа-нәптәңа ювум ики ищи Русскинской кэрта «Вўдең, хўд па вой велпәсләты ёх» емәңхәтлә яңхәс па ямсыева арталәс, муй щирн айдат хәннехуятәт вўдыйн кирум өхләтн кәссәт.

Тәм номерән лўнтаты:

6

Тимофей
па Татьяна
Молдановңан
газетаева ар
айкел хәншсәңан

7

Ямал мўв
Пулңавәт вошн
увәс ёх VIII-мит
вән мирхот вәс

8

Сәрханл район
Русскинская
вошн вўдең ёх
емәңхәтл вәс

11

Сыктывкар
вошн рәт ясңәтн
хәншты вер
олаңан мирхот
мәнәс

14

Нявремәт
вәндтәты хәнты
не З.П. Попова 85
ода йис

Округ кәшә не пида вәйтантупсы

Мәнум тылӑш 23-мит хӑтлӑн Ёмвоша округ арсыр вошӑт па кӑртӑт эвӑлт айкедӑт ӑкӑтты ӗх юхтылдӑт. Дыв хӑлум шос мӑр округ кәшә не Наталья Комарова арсыр мосты верӑт олаӑӑн иньшӑссӑт. Лӑв 30 мет мосты вер олаӑӑн путӑртӑс.

Одӑӑн лӑв иньшӑссы, Россия мӑв кәшә пида лӑв карты кел хӑват путӑртты па мосты вер олаӑӑн иньшӑсты шир тайл муй ӑнтӑ. **Н.В. Комарова** ястӑс, хуты президент пида путӑртты лӑв шир тайл. Тӑп лӑв мет мосты верӑт олаӑӑн лӑв эвӑлтӑда иньшӑсл. Иса тывты нӑшайт округ кәшә не рӑпитты ӗхлӑд пида тӑӑматл, щиты президентӑн вӑйтды, хуты Югра мӑвевн верӑт яма мӑндӑт.

Кәшә не иньшӑссы, хән Нуви сӑӑхум район Сосновка вош эвӑлт Ямал мӑв вӑнты ӗш йилпатты питды. Наталья Владимировна ястӑс, хуты интӑм кәшә ӗхлӑв щиты мосты вер ӑхтыйн

рӑпитлӑт, лӑдн округевн иса кӑртӑт па вошӑт кӑтӑдн ӗшӑт ат тайсӑт. Ямал мӑв вӑнты ӗш щиты пурӑйн верты питлӑт, хән щиты мӑв кәшәйт ищи мӑӑ мӑвев вӑнты ӗш йилпатты одӑитлӑт.

Щӑлта ясӑн мӑнӑс хот лӑтты щира субсидия вухӑт олаӑӑн. Интӑм щиты вухӑт вохты щира 27 шурӑс мултас айлат хоттел ӗх па 3600-кем шуши мир семья хӑншман вӑд. Наталья Владимировна лупӑс: «*Округев хӑваттыйн ол мӑр тӑп 2500-кем хоттел ӗх субсидия вух холумлӑт. Округ бюджетн вухӑт хӑйдыт ки, дыв имухты субсидия вера мӑдыт*».

Мирхотн уша йис, хуты Ямал мӑвн шуши хуятӑ-

та паспорт пида непек мӑды, хута хӑншман вӑд, щиты хӑннехӑ хӑнты муй юрн хуят. Югра мӑвевн реестр вӑд, щӑта шуши мир иса немӑт хӑншман вӑдлӑт. Мӑвев кәшә не лупӑс, хуты институт пӑншты мосл, лӑдн щӑта рӑпитты ӗх уша ат версӑт, мӑта мир эвӑлт щиты хӑннехӑ вӑд.

Кондинской районн мир округ луваттыйн мет ар вух хотӑт хошмӑлды пӑта сухуптӑдӑт. Мәнум тӑдн дыв и тылӑш мӑр 15-20 шурӑс шойт вух сухуптӑсӑт. Щит шеӑк ар. **Н. Комарова** лупӑс, хуты щӑтакотельной хотӑт нефть ширн рӑпитлӑт, щит пӑты шеӑк тынӑӑ хошум. Интӑм щиты вер ӑхтыйн кәшә ӗх рӑпитлӑт, лӑдн котельнойт па ширн ат рӑпитты питсӑт.

Щӑлта лӑв эвӑлтӑда уша йис, хуты округевн

мир хот войт енмӑлды пӑты вух нӗтупсыйн мӑдыт, и вой пӑты ол мӑр дыв 24 шурӑс мултас шойт вухн сухуптӑдыт. Щит хоттел ӗх, хуятат шимл хот вой тайлӑт, ӗхӑтшӑк пидӑтты питдыт. **Н. Комарова** ясӑӑдал ширн, щиты дыведа кеншӑк рӑпитты питл, и хуятӑт войт лӑпӑтты пӑта турн муй па утӑт лӑшӑтты питлӑт, па хуятӑт вой нюхи эвӑлт лӑтутӑт верты питлӑт. Щиты яма па кеншӑк рӑпитты питл.

Щӑлта Наталья Владимировна иньшӑссы, хән Мӑнстар район Андра вошн Ас шӑпи хӑхлеп верты питды. Лӑв ястӑс, хуты кәшә ӗх щиты вер тәса вантман тайлӑт, одӑӑн Сӑрханл вошн Ас шӑпи хӑхлеп верды, щиты юпийн Андра вошн омӑсты одӑитды.

Надежда РАГИМОВА

Вӑдӑн ӗх верӑт олаӑӑн путӑртсӑт

Мәнум лӑпӑтн Ёмвошн увӑс мир ассамблея, дума комитетӑт па округ дума мирхотӑт вӑсӑт. Депутатӑт щӑта арсыр мосты поступсӑт нух вантсӑт па вӑсӑт.

Увӑс мир ассамблея мирхотн округ правительствӑ ӗх ясӑӑ тӑсӑт, муй ширн вӑды тайты вер олаӑӑн поступсы 2016-мит одн лӑшӑтсы. Ӗхӑт па тӑм поступсы округ дума пурӑйн депутатӑтн вӑсы. Щиты олаӑӑн ассамблея мирхотн промышленность верӑт тӑты департамент кәшә лӑӑкӑр хӑ **А. Киселӑв** па недропользования па природной ресурсӑт департаментӑн увӑс мир верӑт тӑты тӑхи кәшә ики **Е. Лавров** путӑртсӑӑн.

Вӑды тайты вер мӑӑ увӑс мӑвевн катра йис вӑш эвӑлт вӑд. Тӑм йисн мет ар вӑды Нуви

сӑӑхум районӑн Касум кӑртӑн па Сӑмӑтвош районӑн Саранпауль кӑртӑн тайды. Луваттӑдн округевн кӑт сельхозпредприятия тӑхеӑӑн – Касумн па Саранпаульн, хӑлум община тӑхи: «Осетные», «Ильбигорская» па «Остяко-Вогульск» рӑпитлӑт. Нуви сӑӑхум районӑн вӑды тайман 26 дыв саттӑда вер тӑты тӑхи вӑд. Нуви сӑӑхум, Сӑмӑтвош, Нижневартовской, Сӑрханл, Ханты-Мансийской районӑтн ашнал мирн юкан вӑды тайты 408 тӑхи хӑншман. Иса ияха лӑӑӑтты ки 2016-мит од одӑитумн округевн

40 193 арат вӑды тайсы, 2017-мит одн – 41 202 вӑды. Российской академия наук Уральской отделенияйн кӑпӑртты ӗх лӑӑӑтсӑт, хуты округевн 2020-мит од вӑнты 46 620 арат вӑды тайты щир вӑд.

Мәнум одн Касум па Саранпауль вӑды тайты тӑхеӑӑн 119,5 тонна арат вӑды нюхи лӑшӑтсӑт па тынысӑт, общинайт пида, ияха килӑӑӑтты, 158,5 тонна арат нюхи.

Депутат хӑ **Е. Айпин** щиты олаӑӑн лупӑс:

– *Округевн тӑмхӑтл шимл вӑды нюхи тыныды, тӑп 0,9 процента па нюхет кӑтн. Мулдыкем арсыр ванлтупсӑт пӑта колбаса, тушӑнка па па яӑккем ширн вӑды нюхи верды. Ма нӑмӑслум, лӑдн*

вӑды нюхи яма ат лӑтсы, мосл хурамӑӑ хира пунты, лӑдн нюхи ӑлудман ал вотсы па хӑннехуятӑт имухты щит ат лӑӑхасӑт. Округевн лӑдн шимӑӑ тӑхи версы ки, вӑды тайты ӗх пӑта щит мет ӑмӑӑ лӑдн вӑс.

Ищиты депутатӑт уша верты лӑӑхӑдӑт, муй ширн округевн вӑды тайты вера айлат хуятӑт вӑнлтӑдыт, вӑды тайты ӗх муйсӑр па муй арат пуртӑнӑтн мӑдыт. Муй арат вӑды наука ширн вӑнт шушийн тайты рӑхл. Щиты тумпи поступсы вӑты мосл, лӑдн кӑшӑӑ вӑды тайты тӑхийн вӑдӑт пӑта немасыя посӑт ат версыйт. Щит мосл, лӑдн вӑйтты, мӑта хӑ вӑдӑт па муй арат вӑды араттыйн вӑд.

Надежда ВАХ

Мосты поступсэт нух вантсыйт

Ай кер тыдӑш 31-митн губернатор не Наталья Комарова округ кӑшайт мирхот верӑнтӑс. Щӑта 20 вер нух вантсы.

И вер – щит машина тӑтӑн йиҫк юкана пасыр сыстам ут пунты олаҫан Россия президент поступсы олаҫан путӑртсы. Щи вер дерамтты ӗх уша версӑт, хуты округев дуваттын сыстам дыд рӑв вӑд. Вантӑ, 2014-мит од вӑш

эвӑлт округевн газн яҫхты мӑшинайт ӗх 50 процент шимӑшӑк транспортной налог сухуптӑдӑт. Щи тумпи округев дуваттын машина газ пунты 8 станция вӑд. Еша-вӑд Верхнекалымской кӑртӑн иҫимӑш тӑхи

пӑншы. Едды Ёмвош, Сӑрханл, Нефтеюганск, Нижневартовск вошӑтн па иҫимӑш станцияйт омӑслыйт.

Щи тухалпи мирхотн 2020-мит од вӑнты социальной верӑт тӑты шурас ӗх Реестр тӑхия нух хӑншлыйт.

Мирхотн округ кӑшайт кӑт поступсыя йилуп верӑт нух хӑншсӑт. «Развитие обра-

зования» поступсыйн нух хӑншсы, муй ширн мӑвтел мир ӑд рӑпатая вӑндтыйдты «WorldSkills» кӑсупсыйн нух питум нявремӑт вухӑн мойлупсӑт ӗша мӑты. Щи вер Россия мӑв бюджет эвӑлт «Доступная среда» округ поступсыя 16,5 миллион шойт есӑлды.

Людмила ШУЛЬГИНА

Мӑвевн ар няврем сема питл

Ай кер тыдӑш 16-17-митн здравоохранения департамент вӑн мирхот верӑнтӑс, хута ай павӑтсы, хутысаты леккарӑт 2016-мит одн рӑпитсӑт.

Щи мирхот губернатора нӗтты хӑ **Всеволод Кольцов** пӑншӑс: «Ям вантты вӑд, хутысаты мӑҫ 2016-мит одн тӑса рӑпитсӑв. Здравоохранения рӑпатнекӑт унтасн па Юграев правительства рӑпата рӑвн округев хуши сыры иты ар няврем сема питл па шимӑшӑк хуят ӑнтӑма йил. Мӑҫ мӑвев леккар хотӑт Россияйн яма рӑпитты тӑхета лӑҫтӑсӑт». Кӑш ар вер яма лӑшӑтман вӑд, В. Кольцов лупӑс, интум вӑнты ар хуята ӑн мӑстӑд, хутысаты пӑльницайт рӑпитлӑт: «Муй пӑты ям пурмӑсӑн пӑльницайт олаҫан ар хуят атма нӑмӑсӑд? Ма ширемн, рӑпатаев яма алыты мосд, хӑн мӑшӑн мир леккар хотӑт олаҫан ишӑкты ясӑн лупты питлӑт».

Здравоохранения департамент кӑша **Алексей Добровольский** ясӑн ширн, тӑм пӑлян округевн ярхӑс лапӑт леккар хот, хута ветьян мулдтас шурӑс хуят рӑпитл. Щи ӗх кӑтн нивл шурӑс – щит тохтурӑт.

Тӑняд «Земский доктор» немуп федеральной поступсы унтасн 74 хуят кӑртӑн пӑльницайта рӑпитты мӑнсӑт. Сыры олаҫтн 20-24 шимӑш хуят вӑс. «Па мӑвӑт киньши мӑҫ хушева ям вӑдты па рӑпитты, щит пӑты непекаҫ ӗх тыв йилӑт па тӑняд 150-кем хуята тохтур ара йис. Мӑҫ кӑртлӑвн иҫи мет ар тохтур па ай леккар рӑпитл», — лупӑс щи хӑ.

Уша йис, 2018-мит одн тохтурӑт па леккарӑт тыдӑш вух 200-кем процент араттыя нух алумды. «2016-мит одн немхуят тыдӑш вух ая ӑн йис: тохтурӑт 92-кем шурӑс шойт вухн сухуптӑсыйт, леккарӑт – 50-кем шурӑсн, нӗтӑсты хуятӑт – 37-кем шурӑс шойтӑн», — лупӑс департамент кӑша.

А. Добровольский ясӑн ширн, мир лекшитты вера кӑсна эвӑлт ям арат вух мӑды: «59-кем миллиард шойт вух – щит и миллион 647 шурӑс хуят лекшиттыя. Па мӑвӑт киньши щит мет ар вух». Вантӑ, РФ

кашӑн мӑшӑн хуята 12 шурӑс шойт вух арат тӑруптӑды, округевн – 22 шурас шойт арат, нух нӗтты вух унтасн 36 шурӑс шойт араттыя йис.

Тӑняд ям пурмӑсӑт унтасн пӑльницайт хуши хӑлмхушьян шурӑс хуят нух тӑҫматсы. Щи хотӑт 2014-мит одн 800-кем йилуп пурмӑсн мӑсыйт, 2015-мит одн – 1300 шӑҫкӑт араттын, тӑняд – 87 пурмӑсн. Мӑшӑн ӗх тӑтылтыя хӑс яртӑян тӑтӑн ӧхӑл дӑтсы. Йилуп тухлӑн хопӑт иҫи лӑтыйт.

2016-мит од А. Добровольский ям ола лӑҫӑтл. Вантӑ, Сӑрханл вошн «Нефтяник» немуп йилуп пӑльница пӑншы па ешайн щӑта сӑм мӑшӑт лекшитты хот рӑпитты питл. Когалым па Урай хуши леккар хотӑт йилпатсыйт, Нефтеюганскайн па Урайн йилуп дety-янышты па пӑсӑнтыйдты хот йитӑт версыйт.

Нӗтупсы олаҫан путӑртмалн, А. Добровольский лупӑс: «Округевн ар няврем сема питл, тӑняд хӑтхушьян шурӑс арат хуята мирев ара йис. Па мӑвӑт

киньши тӑта мет ар няврем сема питл: 15,7 арат и шурӑс хуят эвӑлт, Россияйн – 12,9. Тӑняд округев хуши и шурӑс хуят эвӑлт 6,2-кем арат хӑннехӑ ӑнтӑма йис, па мӑвӑтн – 12,9-кем хуят вӑс. Россияйн шимл мӑв, хута вер щиты яма вӑд».

Едды А. Добровольский лупӑс, кӑды дер кӑшет, турӑх мӑш пӑвлупсӑт эвӑлт шимӑшӑк хуят ӑнтӑма йиты питӑс. Ай пушхӑт эвӑлт 4,1-кем няврем и шурӑс хуят кӑтн сурма питл. РФ Президент поступсыйн хӑншман, 7,5-кем хуят и шурӑс хӑннехӑ эвӑлт сурма питлӑт, нацпроект хуши хӑншман – 5,5-кем арат.

Департамент кӑша вевтам верӑт олаҫан иҫи путӑртӑс. Тӑняд Когалым, Нягань, Сӑмӑтвош, Нефтеюганск па Нижневартовск пӑльницайт хуши тохтур шимла йис, кӑш мӑҫ мӑвевн ям вӑдты па тыв ар хуят кӑсӑд. Няд пӑльницайн нӑртама нявремӑт шив пунсыйт, лӑдн щит унтасн ОМС тӑхи эвӑлт вух холумты.

Реональда
ОЛЬЗИНА

Ай кер тыдәш 27-митн «Югра» немпи айкеләт ака́тты хотн профпатология та́хи кә́ща па округ депутат хә Николай Ташланов пида вейтантупсы вәс. Лүв ай тәс, муй ширн передвижной леккар хот 2016-2017 хотн рәпитәс па елды рәпитты питл.

Көртәң мир леккара́тн вантсы́йт

Н. Ташланов лупәс, 2015-мит одн округ мир яма́лды вер тәты департамент кә́щайт инумса юхә́тсәт, лә́дн мўң тохтурлүв ай кә́ртә́та мир вантты ат яңхсә́т. Ши пура вўш эва́лт округев хўват-тыйн лўңа́н «Николай Пирогов», та́дн – 17 ма-шинайт яңхты питсә́т.

Тәм та́дн тохтурә́т 17 ай кә́рта яңхсә́т па 9 шура́с хуят нух вантсә́т. Ши тумпи вет пўш са-нитарной тухла́ң хоп вохийлсы.

Ин «Николай Пиро-гов» немпи тўта́ң хоп Сәрханл вошн нух вер-ды, лыпә́т енумты ты-ла́ш 1-митн па ши кә́ртә́та ма́нд. Ши тўта́ң хоп 19 од рә́питты веритл. Ин яма йилпатды ки, моса́ң, вет од елды па рә́питты питл. Тәм лў-ңа́н тохтурә́т 45 кә́рта ма́ндәт па 6 шура́с хуят нух вантлә́т.

Интәм Ёмвош проф-патология эва́лт Сәр-ханл вошн филиал та́-хи рә́питл. Ин шив иса мосты пурма́сәт, шўң-ка́т лә́тдыйт. Ёмвош профпатология та́-хи кә́ща Н. Ташланов лупә́с, моса́ң, хә́нт-ты ишимә́ш филиал Нижневартовск вошн пўншды.

Людмила
ЛОНГОРТОВА

Ям верә́т ола́ңа́н ай павә́тты мосл

Югра Природнадзор немуп та́хийн хәншман, Ёмвош округ ху́щи 70 вән та́пры пай вә́д. И пелә́к та́хета муниципалитетә́т на́мпәр шив тә́дәт, кимит пелә́к та́хета – питы вуй холумты рә́пата хотә́т. Лә́дн немхуят хә́ния та́пры пайт ал версә́т па интум вә́лды ута́т нух сы́стамтты 2017-мит одн «Генеральная уборка» немуп вер лә́шә́тсы. Ши вер ола́ңа́н, шә́лта Общероссийской народной фронт рә́пата ә́хтыйн ай кер тыдә́ш 22-митн Югра кә́ща не Наталья Комарова ши та́хи ә́х пида путә́ртәс.

Мирхот пўншумн мў́вев ух не лупә́с, эко-логия од пура́йн кә́ртә́т па вошә́т на́мпәр эва́лт худт сы́стамтты мосл. Лү́в ясә́д ширн, Народной фронт ху́щи рә́питты ә́х ямсы́ева ле-рамтлә́т, ху́тысаты здра-воохранения рә́пата ма́нд. Шә́лта лү́в нәмә́сл ОНФ ә́х па кә́ща хотә́т рә́патнека́т худна ия́ха рә́питты а́н вә́ндсә́т. Вантә́, «Интерактивная карта свалок» немуп вер кә́ща хотә́тн интум вә́нты мосты ширн а́н лә́шә́тсы. «2017-мит одн округевн ня́дхушья́ң та́пры пай нух сы́стамтсы, ши кар-тайн худна ар шимә́ш та́-хи хә́шә́с. Итә́х кә́щайт ОНФ ә́х хәншум не́пекә́т посн иса ю́хды не́ма́лт а́н хәншсә́т па хә́дә́ң мў́вә́т хў́в ма́р сы́стамтсә́т» — лупә́с Н. Комарова. Лү́в нәмә́сл, кә́щайта па об-щественной верә́т лә́шә́т-ты мира вә́тща рә́питты мосл, лә́дн мў́вев на́мпәр эва́лт худт сы́стамтты.

Тәм пўш обществен-ной связят департамент рә́патнека́т НКО ә́ха па па хуятә́та не́пек хәнш-сә́т, ху́тысаты мў́в сы́-стамтты вер нух дера́мтты па кә́ртә́т, вошә́т сы́стама верты. Тәм пў́дяң ши не-пек посн Нижневартовск мир рә́питты питсә́т. «Ши вер шә́та яма ки лә́-шә́тды, ши пура́йн па муниципалитетә́т ху́щи ишиты рә́питты питлү́в па ши ут «Дорожная инспекция/Карта убитых дорог» немуп вер пида лә́шә́тты вў́янтлү́в», — лупә́с губернатор.

ОНФ рә́патне́к Л. Белоцерковцева ай павтә́с, дыв вет од ма́р кө́ртә́ң па вошә́ң кә́щайт пида ия́ха рә́-питлә́т. Ши ма́р ям ве-ра́т версә́т, итә́х верә́т худна уша́ңа лә́шә́тты а́н тывә́с. Лү́в ясә́д ширн, ОНФ, здравоохранения департамент па обра-зования департамент мир ня́времә́т лекшит-ты верн яма рә́питсә́т. «Мў́ң мў́вевн шко́льная медицина вер па мў́-ва́т киньши мет яма лә́-шә́тман вә́д. Елды ши ут ола́ңа́н не́пек хәншты мосл па губернатор шитн ә́ш пос ат пунл», — нә-ма́сл ОНФ не. Елды лү́в лупә́с, пуртә́нә́т тыны́ты вер кә́ща хотә́тн рә́питты ә́х пида дыв тў́ңшира́ңа версә́т. Шит пә́ты 2016-мит одн мурта́ң хуят лупә́с, ху́ты мосты пур-тә́н лә́тты дава́рт вә́с.

Шә́лта ОНФ не лупә́с, елды ямсы́ева нух вант-ты питлә́т, лә́дн хў́в мў́-ва́тн вә́лды кө́ртә́тн ня́в-ремә́т па вән ә́х мосты пура́йн ат лекшитлдыйт. «Мў́ңева ама́т, па мў́-ва́т иты та́та ФАПә́т па ай пә́дьница́йт лә́п а́н тә́ха́рсыйт. Ишипа ши хотә́т рә́пата не́-ла́м дера́мтты пит-лү́в», — нәмә́сл Л. Бело-церковцева.

Иши ОНФ ху́щи рә́-питты не И. Бирук лупә́с, худна уш а́нтә́м, ху́йта́т кә́ща хотә́т ху-щи «Комфортная го-родская среда» немуп вер дера́мтлә́т. Ши та́-хи сайтә́тн не́ма́лт ши ола́ңа́н а́н хәншман.

Наталья Комарова ай павтә́с, округев пра-вительства хә́дум од ма́р мў́в сы́стамтты верн рә́питлә́т. Тә́няд ши вера кә́сна эва́лт ветсотке́м миллион шойт вух та́руптә́сы. «Федеральной кә́сна эва́лт вухн ма́дыюв муй а́нтә́, ишипа мў́вев сы́стамтты питлү́в», — лупә́с ши не. Лү́в яс-ә́д ширн, хот ов мў́ва́т сы́стама верты́а хә́дум та́хи эва́лт вух ма́ды: 50% — округ кә́сна, 30% — вошә́ң кә́сна, 20% — хо-тә́тн вә́лды мир. «Тә́миты мирев мў́в сы́стамтты не́тлә́т. Тә́п дыве́да па депутатә́та така вантты мосл, ху́тысаты мў́вев на́мпәр эва́лт сы́стамт-ды» — нәмә́сл Н. Комарова.

К. Терновой иши ОНФ ху́щи рә́питл. Лү́в лупә́с, кә́ща хотә́тн рә́питты мир итә́х пура́йн ды-ве́да ю́хды не́ма́лт а́н хәншлә́т. Шә́лта вә́д-вә́д дыв уша верлә́т, ә́шә́т йилпатты пура́йн итә́х вухә́т на́ртама та́-руптә́дыйт, ши кемн ә́шә́т атма йилпатлдыйт. «Ши верә́т мў́ң не́масы́а нух вантлү́в: кә́ща хотә́тн рә́питты мир вў́наватә́т муй рә́пата уша́ңа а́н лә́-шә́тсы. Ин вә́нты ә́шә́т нух верты ә́х па кә́ща хот рә́патнека́т ия́ха рә́-питты а́н вә́ндсә́т. Ши вер дера́мтсү́в па уша йис, муниципалитетә́тн ши рә́пата тў́ңшира́ңа а́н версы. Шит пә́ты кә́сна вухә́т до́лумты кә́м вә́д. Шә́лта уш а́н-тә́м, хән ә́шә́т мосты ширн йилпатлдыйт, ху́й-тат атум рә́пата пә́ты дывә́ттә́дыйт», — лупә́с К. Терновой. Шит тў́ң-матты́а па уша верты, ма́га кә́ща хотә́т мет яма ә́шә́т лә́шә́тлә́т, ОНФ рә́патнека́т шит нух вантты ла́ңхалә́т. Ә́хә́т яма рә́питты ә́х ола́ңа́н дыв ар мира ай павә́тлә́т.

Реональда ОЛЬЗИНА

Вэн йиңк оланҥан путар вэс

Ай кер тылдьы 21-митн «Югра» немпи ай-келат аҕатты хотн Югра мўв МЧС тахи кэша хэ Александр Тиртока па МЧС Сибирской региональной тахийн тут хэрятты вертэты кэша ланҕар хэ Александр Еремеев ай тэснэн, муй ширн округевн вэн йиңка лэщатыйлты.

А. Тиртока лупас, хути еңк манти вер кат шира йил: Ас нопатты тылдьы 1-2-мит лапатн Лаңалн

па Томской область хуца Асн еңк нопатты олңитал. Тэп лыпат енумты тылдьы юхи хашум лапатн уша

йил — вэн йиңк питл муй антэ.

А. Тиртока лупас, юхи хашум олдатн ар версы: ар эш-пант нух алумсы, мўв пайт йилпатсыйт па па верат версыйт. Ин еңк яма манти шира мосты верат лэщатсыйт, ешавэд МЧС хуца рэпитты хэ хуятат

вэндтаты питдыйт. МЧС Сибирской региональной тахийн тут хэрятты вер тэты кэша ланҕар хэ А. Еремеев ай тэс, хути комиссия эх уша верлат, тал мар муй арат доньщ питас. Ши юпийн уша йил, вэн йиңк питл муй антэ. Еңк нопатты пура вэнты худна кат тылдьы хашас, ар мосты вер верты мосл.

Людмила СПИРЯКОВА

Мўват систамтдыйт

Народной фронт немуп тахи эх картат па вошат нампар эвалт нух систамтты па ям эшат верты тахет лэщатсат. Шитат «Генеральная уборка», «Дорожная инспекция ОНФ/Карта убитых дорог» па «Формирование комфортной городской среды» ширн альщадыйт.



Нявремат вэнт систамтлат

Природной ресурсаг департамент хур

«Генеральная уборка» верты питсы, лэдн рэпата хотат па ханнехэйт ан рэхты тахетн тапяр ад вушкэсат па мўев мухадая иса сыстама ат йис. Шит ропахн «Интерактивная карта свалок» немуп ут лэщатсы, щата нух ханшды, хута вэн тапры пайт вэлдат. Мосл лупты, кэщайт тумпи ал хуятата ши пайт оланҥан kartasvalok.ru тахия иши ханшты рэхл.

«Формирование комфортной городской среды» немуп вер посн хотат кималн па рутьщаты тахетн мўв нух систамтты пиньщасы. Ши рэпата муниципалитетат эх картан па вошан мир пида ияха верлат. ОНФ хуци ши

ут Центр мониторинга немуп тахи хуятат нух вантлат.

«Дорожная инспекция ОНФ/Карта убитых дорог» вер унтасн эшат нух лэщатты питсыйт па нэдам дерамтды, щата лотат вэлдат муй антэ. Хута эшат иса атумат, ши оланҥан dorogi-onf.ru тахия ханшты мосл.

Емвош округ — Югра хуци рэпитты ОНФ эх иши там хэлум вер верлат. Ай кер тылдьы 13-митн Константин Терновой, Сергей Дубовец па Евгений Печерица путарсат, хутысаты округевн ши верат манлат.

Константин Терновой:

— Мўн катдем ол мар ши верат верлўв. Юхи хашум олн мет така вантлўв, шўкатум эшат

вэлдат муй антэ. Щалта мўев сыстама тайты вер иши дерамтлўв. Харция рэпитлўв, мўев систамтты оланҥан там ванан интерактивная карта лэщатсўв. Щалта «Формирование комфортной городской среды» немуп мирхот верантсўв, хута картат па вошат систамтты оланҥан путартсўв па альсўв, хуятат шит мет яма верлат. 2017-мит олн ши вер елды тэлэв. Сыстама муй хэлэна вэлты — ши оланҥан вэшан па картан мир иши ат нэмаслат. Вантэ, лывела там мўвн елды вэлты, шит паты иши мўев сыстама ат тайлат.

Сергей Дубовец:

— Интум тапры пайт оланҥан общероссийской сайт вэл, кашан хуят шир тайл ши пай оланҥан шив ханшты па хур шив пўватты. Там ванан муниципалитетат кэщайта ханшсўв, лэдн мўева ай ат паватлат, хута дыв лўнҥан йилуп эшат верты пиньщалат па катра эшат йилпатты питлат. Эхат нух вантлўв, муй ши вер оланҥан вошан мир ханшлат. Мосл лупты, катра эшат картайн вушдум посат тайлат. Хэн шитат нух йилпатдыйт, дыв вустыя йиллат. Ма ширемн, нэлам вошан мир иньщасты мосл, муниципалитет рэпатнекат яма муй атма эшат нух лэщатлат?

Ши юпийн лупты рэхл, ушан муй пулыя дыв рэпитлат.

Евгений Печерица:

— Мўв систамтты вер лэщатты питсы, хэн Россия Президент нампар эвалт мўвлўв нух систамтты партас. Ши юпийн Россия хўваттыйн хэлэң тахет интерактивная немуп картайн мира ванлататы питсыйт па «Генеральная уборка» немуп вер лэщатсы. Ши карта — шит мет вулаң вер. Интум ханнехэйт шив ханшты рэхл, хута леваса тапяр вушкэсы па шит дывела турас верл.

Ши вер немасыя версы, лэдн кэщайт па ханнехэйт ат нэмаслат, хута нампар вушкэты рэхл, хута иса шит верты ан мосл. Щалта интум нэмасты мосл, хутысаты мўват нух систамтты па кашан картан, вошн мосл вэйтты мўв, худта тапяр вушкэты рэхл. Мўн тэнлуп тылдьы вўш эвалт апрана мўв систамтты вер лэщатты вўянтсўв па там пўляң ОНФ сайта 76 пишма юхтас, хута мирэв хэлэң тахет оланҥан ай паватсат. Интум 73 непек посн ханшум верат нух дерамтлўв. И вер сора кеши нух тўнматсўв: пишма юхтум юпийн Емвошн кат хатл мар тапры пай нух систамтсы.

Реональда СУРЕЙСКАЯ

«Ханты ясәң» газетая хәншләңән

Ас нопәтты тыләщ 1-мит хәтәдн 1957-мит одн мет оләң хәнты ясәңән хәншум «Ленин пәнт хұват» немуп газета етәс. Щиты 2017-мит одн рәт яснуп непекев 60 ола йил. Тәм газетая ар хәнты әмәщ путрәт, моньщәт, йис арәт хәншийлдәт. Ар од мәр тәм непек унтасән Тимофей па Татьяна Молдановңән сыр-сыр верәт оләңән ай павәтләңән.

Тимофей Молданов хәнты мир үчәной ики, лүв арсыр хәнты мир эвәлт йис моньщәт па путрәт нух хәншиләс. Әхәтщитләд «Кань кунш оләң» немпи киникайн есдыйлсәлэ. Щи тумпи лүв пүпи якты хот оләңән па емәң арәт вәюм әх оләңән «Хәнты ясәң» немуп непека хәншиләс. Щәлдта Т. Молданов стихәт па арәт газетая китыләс. Щиты лүв 1997-мит одн Ас хәдгы тыләщ 11-мит хәтәдн «Хәнты ясәң» газетая йилуп стихләд хәншәс:

Немды питум мұв

Хетта хонәң әхум хуца,
Әхум хұват вәдләт дыв.
Ваншәң, турнәң хот вул ар.
Щәта вәсәт хәнты әх.
Щәта ая вәсум ма.
Харсурт кәрт вул,
Тәщин кәрт вул,
Ин па айлә вәдум
Кәрт вул.
Хетта юхан щәта вәл,
Кашәң мұви нем па тәйл.
Амаләев варәң мұви,
Микитаев варәң лух.
Щиты юхан немәң вәс.
Ин ки мәндәт па әх щив,
Муйсәр мұви, дыв әнт
вәдәл,
Муйсәр лух, па хульща
вәдәл.
Мұң па мәнсүв ар тәхия.
Щиты йиңкев немды
питәс,
Щиты мұвев немды
питәс.

Тимофей Молданов лупәс:

–Мәнтыхәнтыясәңән хәншты Мария Волдина хушсәлэ. Лүв исалупийс, «Нәң ясәң яма тәйләң, хәнша газетая. Мәта

мұва яңхләң, имухты хәнты мирева путәртә». Щиты ма «Хәнты ясәң» непека хәншты питсум.

Исторической наукайт кандидат ими **Татьяна Молданова** вән үчәной нем еша павтәс хәнты мирд хәншет оләңән хәншмәд пәта. Лүв «Хәнты ясәң» газетая ар путәр вәнт кәртәтн, ай вошәтн вәлты әх оләңән хәншәс. Щәлдта тәм хуятәв ямсыева хәншийлсәлэ, муй иты хәншәң нюплув сәх әнтәд. Щи тумпи Татьяна Александровна ар киника хәнты мир вәлупсы оләңән хәншәс. Щит «Архетипы в мире сновидений хантов», «Пелымский Торум – устроитель медвежьих игрищ», «Очерки традиционной культуры




Тимофей па Татьяна Молдановңән
Петя пухән пида

хантов», «Казымский орнамент» па па киникайт. Щи тумпи лүв пәлтап Касум ләд оләңән мет сыры «В гнәздышке одиноком» немуп киникайн хәншәс. Щәлдта оса верәт тәты «Югра лыднуптәты» тәхи пүншты нәтасәс. Татьяна Молданова 1991-мит одн вұш тыләщ 27-мит хәтәдн етум «Хәнты ясәң» газетайн «Касум мұв хәнтәт хәншет» оләңән ай павтәс:

«Мұң округевн хән-тәт ар тәхетн вәдләт, тәх хәнтәт вошәт вәлупсыя питсәт, тәх хәнтәт худна вәнт мұвәтн, ай кәртәтн вәдләт, йис вәлупсы едды тәдәт. Ин хәнты мир йис вәлупсы худна яма хәщәс Аган, Тромаган, Юган, Вах па Касум юханәтн вәлты хәнтәт хуца. Щи ар юханәтн вәлты хәнтәт арсыршәк ләмәтсухәт тәйләт, имет арсыра хәншет верләт. Ма щи хәнши верты вер вәндтәдум па непека щи вер хәншлум. Ин ма хәншлум Касум мұв имет верты хәншет оләңән. Касум мұвн ин хәнши верты ар ими вәл, тәх әхләд тәм мұвн сема питсәт, тәх әхләд па мұвәт эвәлт юхәтсәт. Мет хурамәңа па тәса хәнши эвәтләңән па верләңән Тоголмазова П.Г., лүв Хүдлорн сема питәс, Аликова Т.П., Енгух А.П., дын харсурт именәң, Тебетева Т.Т., Тарлина Е.Н. Муяң эвәлт юхтум неңиәң па ар тәс ешәң неңиет Касум мұвн вәдләт»...

Тәм кәтңән Касум мұвн енумсәңән, ин Емвошн вәдләңән па рәпитләңән.

Ульяна ДАНИЛО



Хәнты па вухәд мир йис хәншет

Увас ёх VIII-мит вэн мирхот



Саха (Якутия) мўв ёх



С. Пальчин, Е. Айпин, В. Санги па Ю. Накова

Ямал мўвн Пулднавът вошн ай кер тылдьш 23-24-мит хьтлдьнньн шуши ёх арсыр мўвът эвьлт вэн мирхота юхтыйдсът. Делегат ширн нядсоткем арат хьннехэ щьта вэс, Россия мўв, округьт дуваттыйн дэщьтты верьт кэща хуятьт па тьта вэсът.

Россия Президент кэща льцькьр хотн рэпйтты М. Магомедов, УрФО верьт тэты хэ И. Холманских, Ямал мўв губернатор Д. Кобылкин, Тюменской область кэща хуят В. Якушев па па кэщайт вўща ясньт лупсьт па докладьт дўньтсът. Магомедсалам Магомедов Увас мир Ассоциация Президента Григория Ледкова пэмашипа ясньт лупьс, хуты дўв няд од мьр поступсы ширн арсыр лавьрт верьт тўнматсь.

Олдьн хьтл ёх ишьк непекем мойдьсьйт, ши хьннехуятьт кўтн шуши мир Арктической совет верьт тэты не Элле Мерете Омма Югра мўв депутата Еремея Айпина мевд пос кьтлуптсь. Ши вэн мойлупсы немасья дэщьтсът Арктика лунум нивд тьхи: Норвегия, Дания, Швеция, Финляндия,

Исландия, Канада, США па Россия.

Етна од вэнтты мир сессия тьхетн рэпйтсът. Дыв щьта арсыр шуши мир верьт олдьнньн пўттьртсът, муй ширн мўвът, вэнтьт, ийнькьт лавьлдты па община ёха нётты мосл. Дьдн йис вўш эвьлт мьнты увас ёх верьт елды тэты па айдьт ёха кьтлуптьт. Ши тумпи рэт ясньн дўньтты па вэндтьйдты пьты непекем есьлдты. Сессия ширн рэпйтты ёх елды рэпата ищи арталдьсът. Ши хьтл якты-ариты хьрн емьньхьтл па вэс.

Кимит хьтл VIII-мит вэн мирхот немасья ши пьты хьншум ар сувн пўншсы. Ши юпийн увас мир хот йит кўшмьлдсы. Мет олдьнньн хурьт вандтьсьйт па нэмьдмьсьйт ши хуятьт, хуятат тьм ваньн аьтэма йисьт па дыв па ёша долюмсьт. Югра мўв эвьлт – вэн учёный вухадь ими



«Югра дьлднуптьт» тьхи кэща нецьнньн М. Заяц па К. Жукова

Е.Ромбандеева, путрьт па моньщьт хьншты юрн хуят Ю. Вэлла, йис верьт тўвум хьнты не Ф. Бондаренко, нарсьтты па ариты вухадь хэ В. Шесталов па па ёх. Ёхьт шуши мира унтас верьт тэты икет па имет вохсьйт.

Юхтум хуятьт Увас мир Ассоциация кэща Григорий Ледков доклад хэдьтсът, ши юпийн мухэ пўттьртсът, муйсър верьт тўна мьнсът па муй елды мосл дэщьтты. Мўн округев эвьлт яма па тэса рэпйтум хуятьт мевд посн муй па ишькты непекем кьтлуптсьйт. Увас

мир Ассоциация кэщайн У. Данило «За верность Северу» мевд посн мьсы, Ямал мўв кэщайн Д. Кобылкинньн А. Новьухов ишькты непекем юкантсы, «Югра дьлднуптьт» тьхи кэща Л. Алфёрова ищи мойдьсы. Кьт хьтл мьр «Народная программа: коренные 2021» непекем арсыр елды дэщьтты верьт пунсьйт.

Россия мўв дуваттьин, хута кепи увас мир аьн вэсът, интьм дыв ищиты така па ияха вўьянтман рэпйтман вэлдьт.

Хьншсь па хурьт верьс
Раиса РЕШЕТНИКОВА

Вӱдең ёх емӓҥхӓтл вӓс

Ай кер тыдӓщ 18-мит хӓтӓдн Русскинской кӓртӓн Сӓрханл районӓн «Вӱдең, хӱд па вой велпӓслӓты ёх» емӓҥхӓтл мӓнӓс. Муй ширн ши емӓҥхӓтл Сӓрханл район па мӱв илпи таш кӓншты тӓхет кӓшайтн тӓм пӱш лӓщӓтса, ши вер олӓҥӓн Русскинской кӓртӓн кӓша хӓ Александр Сытов эвӓлт иньщӓссум.

— **Александр Владимирович, мӓтты айкел тӓм емӓҥхӓтл олӓҥӓн тӱва?**

— Кашӓҥ ол мӓр ай кер тыдӓщ юхи хӓшум хӓтлӓтн Русскинской кӓртӓн Сӓрханл районӓн «Вӱдең, хӱд па вой велпӓслӓты ёх» емӓҥхӓтл верда. Алӓҥ вӱш эвӓлт ямкем ар хӓннехӓ мӱҥ ай кӓртӓв хущи юхтӓс. Шуши ёхлӱв па тӓм емӓҥхӓтл яма вантты арсыр вошӓт эвӓлт сыр-сыр мирӓт тыв ӓктӓшсӓт. Ши тумпийн Организация Объединённых Наций тӓхи кӓшайт па мӱҥ хущева йисӓт.

Лыв артадӓты лӓҥхалӓт, муй ширн па



Вӱдең хӓ кӓсупсийн

хути хӓнты ёхлӱв тӓм йисн рӓт ширн тайты мӱвдалн вӓлдӓт, юкан вӱдыдал давӓлдӓт, арсыр хӱд па вой велпӓс верӓт лӓщӓтлӓт па ясцел муй вӓдты-холты ширдал елды тӓдӓт.

— **Муй пӓта тӓмӓщ емӓҥхӓтлӓт, нӓҥ ширенӓн, кашӓҥ ол мӓр вердыйт?**

— Ма ширемн, тӓмӓщ емӓҥхӓтлӓт вера мослӓт. Ай вӓнт кӓртӓтн вӓдты хӓнтӓт тӓта кӱтӓдн ияха вӓйтантыйлдӓт, тохтурӓтн иса дыв мӓшдал яма артадӓдыйт, арсыр мосты верӓт тӱҥматлӓт, вӱдыйн кирум ӓхлӓтн тӓса

наврӓлтыйлдӓт па ар ширн кӱтӓдн иса кӓслӓт. Ши тумпийн айдатшӓк ёх па тӓта вӓдты-холты пидӓт пурӓйн дыведа мушӓтлӓт па хоттел хуятӓҥа йидӓт. Щӓлта тӓм емӓҥхӓтл олӓҥ шӓсӓтн хӓнты ёхлӱв кӓртӓн, районӓн па округев эвӓлт тыв юхӓтты кӓшайт пидӓ немасыя вӓн мирхот лӓщӓтлӓт, хута дыв вӓлупсыдал олӓҥӓн айкелӓт верлӓт.

— **Муй арат хуят емӓҥхӓтла юхтӓс па муйкем хӓннехӓ вӱдыйн кирум ӓхлӓтн кӓсты питлӓт?**

— Араттелн мӱҥ емӓҥхӓтлӓва нивӓлдем шурӓс хӓннехӓ арсыр тӓхет эвӓлт юхтӓс. Вӱдыйн кирум ӓхлӓтн тӓм кӱтн 62 хӓннехӓ кӓсупсыя яҥхӓс, шит имет па хӓ ёх. Ин тӓп вӓдьши кӓсупсӓт етшӓсӓт па кӓсты ширӓт артадӓты ёхлӱв Сӓрханл район эвӓлт кашӓҥ вӱдең ӓхӓлн мӓнум вер вантлӓт па непека нух хӓншлӓт. Тӓм пӱш олӓҥ тӓхия питум не муй хӓ хуятҥӓн ищи-ты тӱтӓҥ ӓхӓл «Бурӓн» ӓша павӓтлӓт. Кимит

тӓхия питум ёх — па хон пелӓк хоп севӓс моторӓтн мойдӓдыйт. Хӓдмит тӓхи холумтум хӓннехуятӓта, катра олӓт иты, ищи-ты нуви тӱт вушитты машинайт мӓты питдыйт.

— **Нӓҥ ширенӓн, «Вӱдең, хӱд па вой велпӓслӓты ёх» емӓҥхӓтл ямашӓк ин мӓнты питӓс муй ӓнтӓ?**

— Яма ши. Ин тӓп вӓдьши кӓсты ширӓт артадӓты ёх лупсӓт мӓнема, хути мет олӓҥ тӓхия вӱдең ӓхлӓҥ кӓсупсийн неҥӓт кӱтн Светлана Сопочина па хӓ ёх кӱтн Иван Покачев нух питсӓҥӓн. Лын китумтак «Бурӓнӓн» мойдӓсийҥӓн. Кимит тӓхи Зоя Сопочина па Валерий Покачев холумсӓҥӓн. Лын ищи китумтак хоп севӓс моторн катлуптӓсийҥӓн. Хӓдмит тӓхия Людмила Колыванова па Валерий Комтин юхӓтсӓҥӓн. Лын нуви тӱт вӱшитты машинӓйҥӓнӓн юкантсийҥӓн. Мосл лупты, хути хӓнтӓт пӓта тӓм мет ям емӓҥхӓтл вӓд!

**Хӓншӓс па хурҥӓн верӓс
Владимир ЕНОВ**



Хӓнты имет емӓҥхӓтлӓн



Делумтты аргашрӓт

Еӓк порхайӓ
нявремиеӓ

Вет хопты кирум ӓхӓл

Аса вухлум хӓр Пуднавӓт хӓр вошн ай кер тыдӓщ 25-мит хӓтӓлн вӓды давӓдман рӓпитты ӓх авиетн кӓсты хӓра ӓктӓщсӓт. Ямал мӓвн шуши мира юрнӓт, хӓнтӓт па сӓранӓт лӓнтӓслӓт. Ард пелӓк ӓх вӓдыдал пидӓ каслӓсыйдман увӓс щорс вӓнта яӓхлӓт. Щи пӓта авие тӓйты мир емӓӓхӓтлӓт немасыя щиты лӓщӓтлайт, хӓн ташӓт вана Пуднавӓт вош пӓӓл нӓрмӓта юхӓтлӓт. Пуднавӓт вош кимӓлн Полябта юхан хурн вӓлӓ ӓхлӓтн кӓсты хӓр верса.

Ма тыв юхӓтмемн вера амӓтсум, тӓм нӓрмӓӓ йис мӓвн вӓды тӓйты вер ищи па немӓлт хӓнты ӓн вӓшл. Тӓта аел-вӓнелн вӓлӓ ӓхӓлн наврӓллӓт, рӓт ясӓелн путӓртлӓт. Полябта юхӓн питӓр хӓват ар юрн хот ве-

рум, мир кӓсты хӓрн вет хопты кирум ӓхӓллад омӓслӓт. Мет ӓмӓщ вантты, ими ӓхлӓт хурамӓна вурты русыйн есӓлман па вӓдыдал салтум нӓй сул келӓтн кирман вӓсӓт. Щӓлта тӓта имухты кӓт ӓхӓлн делумлӓт кӓсты.

Вет хопты кирум кӓт ӓхӓл ияха делумтыйн тӓп доньщ пӓсӓн кавӓрмийл. Тӓм мӓвн тӓп и щирн вӓдыйн кӓслӓт. Наврӓлмел юпийн уша йис, мет пӓста Николай Валеев мӓнӓс. Лӓв «Бурани» немпи ӓхӓлн мойлӓсы. Щит хӓр нӓрумн вӓды давӓдман рӓпитты тӓхийн мет мосты ут. Кимӓт тӓхия Александр Салиндер питӓс. Хӓлмит тӓхи вӓнта авиедалн Дмитрий Лаптандер наврӓлтса. Щи тумпи вӓды ташӓтн рӓпитты икет тынщӓн вала тӓхсӓт, ӓхӓл элты навӓрсӓт, кӓтӓлн ӓр талсӓт па мӓта хуят мет хӓва навӓрмал, щиты па кӓссӓт. Щӓлта яха кӓншемуман, мӓта хуят сыры илды питӓл, катлӓсыйлсӓт.

Ищки нӓрум мӓвн вӓлты мир мет тӓса хошлӓт ӓнтӓсты. Щиты мет хурамӓн лӓмӓтсух лӓмтум ӓх кӓссӓт. Лыв ӓӓк нӓплув сӓхлал, молупшидал вандтуман шӓшийлсӓт. Щимурт семӓн вантты ям ай нявремиеӓ хӓншӓӓ па ӓӓк

порӓхладн карисӓт. Имет сӓх хӓншидал тӓса йис щирн ӓнтман вӓлӓт. Ма лыв пелӓда вантмемн мурта амтӓтлысум. Щӓлта вӓды давӓлты ӓх емӓӓхӓтл мӓр камӓн иса кулы сувуп арӓт юрнӓт, хӓнтӓт па сӓранӓт арисӓт. Там ӓх кулы сувуп юрн ардал овдыпӓтды вӓн нӓрмӓт иты лӓщкамӓт па хӓрӓт.

Тӓмӓщ хурамӓн емӓӓхӓтӓлн кашӓн хӓннехӓ нюки хотн шайн, лӓнт йиӓкӓн яньщлӓтсы. Вӓлӓ мир емӓӓхӓтӓлн шуши хӓннехӓйт арсыр хӓл, вӓды нюки, мӓрӓх па па воньшумутӓт, вейт па сыр-сыр утӓт тынысӓт. Ма ищи камӓн шӓшийлмем кемн и юрн хота луӓсум. Щӓта хот кӓща не Вера Ларовна вӓс. Шайн яньщлӓтсыум, потум хӓлн лапӓтсаюм. Лӓв нюки хотӓлн омӓсмемн нӓмӓлмӓсем, муй иты ма ая вӓлмемн итӓмӓщ вотум нюки лаӓкум хотн енумсум.

Хӓншӓс па хурӓт верӓс
Ульяна МОЛДАНОВА



Вурты русыйн есӓлм ӓхӓл

2017-мит од ай кер тыдӑшн мӱн, «Хӑнты ясӑн» па «Луима сӑрипос» тӑхийн рӑпитты хуятӑт, щит кӑща не Р. Решетникова па айкелӑт лӑщӑтты кӑтӑн У. Данило па И.Самсонова, Нуви сӑнхум район Касум па Поднавӑт кӑртӑнӑн айлат ёх пӑты айкелӑт ӑкӑтты па хур вӱты немуп вӑндтӑты хӑр лӑщӑтсӱв.



Касум вош ӑшкола нявремӑт

Щи тумпийн тыв Марий Эл мӱв Йошкар-Ола вошн «Марий Эл» газетӑин рӑпитты айлат хӑ Д. Речкин, Ёмвош район Кышик кӑрт ӑшколайн нявремӑт хӑнты ясӑна вӑндтӑты не Л. Дубровина, Сӑрханд район Русскинская кӑртӑн пушхӑт пидӑ рӑпитты ими А. Орехова па «Югра» немуп телерадиокомпаниян нявремӑт пӑты кинайт лӑщӑтты хуят И. Чукомина юхтӑйлсӑт. Тӑм вӑндтӑты хӑр мӱн немасья версӱв, лӑдн айлат ёх вӑндтӑты, муй щирн кӑт ясӑнӑнӑн – рӱщ па хӑнты щирн айкелӑт ӑкӑтты, хӑншты па тӑса хур вӱты мосл.

Щиты вӑн кер тыдӑш 10-митн алаӑ саты мӱн Касум ӑшколайн вӑндтӑты хӑр пӱншсӱв. Тӑта рӑпитты кӑща не **М.В. Носаченко** ӑктӑшум нявремӑт па мойӑна юхтум хуятӑт ешалт вӱща ясӑнӑт лупӑс па лӑнхас, лӑдн мӱн ияха яма па апрӑна ат рӑпитсӱв. Мосл ястӑты, хуты тӑта 5-8-мит класӑтн вӑндтӑйтды 16 няврем вӑс.

Сырья **Р. Решетникова** непекев олаӑн айкел тӑс па путӑртӑс, муйсӑр ӑмӑш верӑт газетаев тумпийн лӑщӑтлӱв. Щӑлта непекев олаӑн хурӑн кина вандтӑс. Хурӑн кина

Нявремӑт айкелӑт лӑщӑтты вӑндтӑйлсӑт

хӱват нявремӑт мет олаӑн ух редакторӑв, елды рӑпитты айкелӑт лӑщӑтты ёх, муйсӑр айкелӑт мира хӑншлӱв, муй щирн нявремӑт рӑт ясӑна вӑндтӑлӱв па па верӑт олаӑн уша версӑт.

И. Самсонова ищи хурӑн кина вандтӑс. Нявремӑт уша павӑтсӑт, муй щирн мӱн айлат ёх пӑты вӑндтӑты хӑрӑт па кӑртӑн лӑщӑтсӱв. Уша йис, хуты сырья мӱн 2015-мит одн Сӱматвош район Тӑк па Лӑв кӑртӑнӑн, Нуви сӑнхум район Ваньшавӑт, Поднавӑт па Касум вошӑтн ичимӑш вӑйтӑнтупсӑт версӱв. Щи юпийн нявремӑт хӑншум путрӑт «Хӑнты ясӑн» газетаевн хӑнты па рӱщ ясӑнӑн есӑлсӱв.

Д. Речкин рӑпатайл олаӑн айкел тӑс. Щӑлта мари нявремӑт пӑты верум непекаӑт, журналӑт па па утӑт вандтӑс. Елды путӑртӑс, муй щирн тӑса па ӑмӑша хур вӱты мосл. Лӱв ясӑндал щирн, мет олаӑн кашӑн газетӑин мир хур вандтӑт, щит пӑты хӱр яма па тӑса верты мосл, лӑдн имухты

уша верты, муй олаӑн путӑр мӑнты пидл.

А. Орехова «Тӑрум юхан хӑсыет» ӑшкола непекев олаӑн айкел тӑс. Тӑта вӑндтӑйлды айлат ӑвет па пухӑт кӑт ясӑнӑн айкелӑт лӑщӑтлӑт. Ин «Тӑрум юхан хӑсыет» газета журнал вӑнты енмӑс. Вантӑ, нявремӑт щимурта айкелӑт ӑкӑтты па хӑншты вӑндсӑт, и газетӑа щи айт ӑн лундӑт.

Тӑмхӑтл «Тӑрум юхан хӑсыет» немуп журнал Сургутской государственной университетн тыдӑш мӑр и пӱш есӑлды. Айкелат лӑщӑтты айлат ёх ӑшкола верӑт олаӑн хӑншлӑт, кӑртӑн вӑлупсы па йис культура верӑт олаӑн мира путӑртлӑт. Щи тумпийн дыв хӑнты щирн сыр-сыр путрӑт, моньшӑт хӑншлӑт. Мет ям, хуты елды тӑм апрӑн нявремӑт Сӑрханд вош университетн айкелӑт ӑкӑтты хуята вӑндтӑйлды щир тайты пидлӑт.

Лӱнтупсы юпийн мӱн нявремӑт пидӑ рӱщ па хӑнты ясӑнӑнӑн ай путрӑт хӑншты пидсӱв.

Щи юпийн кашӑн хуят лӱнтӑс, муй олаӑн лӱв айкел лӑщӑтӑс. Ӑмӑш, хуты мет ар путӑр Марий Эл мӱв ӑвалт юхтум хӑ Д. Речкин олаӑн хӑншсы. Нявремӑт ясӑнӑт щирн, дыведа хур вӱты вер олаӑн шеӑк ӑмӑш хӑдӑнтты вӑс.

Щӑлта сыры олаӑтн «Хӑнты ясӑн» газетаева айкелӑт хӑншум хӑнты ими Светлана Кононова шӑнӑт олаӑн путӑр мӑнӑс. Тӑм нумсӑн ими сырья лӑщӑтум путӑрлал «Рӑт мӱвемн вӑсум...» немуп киникая лӑщӑтсӱв па есӑлсӱв. Щи юпийн лӱв олаӑн хӱрӑн кина вандтӑсӱв.

Вӑн кер тыдӑш 11-мит хӑтӑдн вӑндтӑты хӑра юхтум хуятӑт вӱдеӑ ёх кӑсупсийн ӑктӑшсӑт. Тӑта Касум ӑшколайн вӑндтӑйлды айкелӑт лӑщӑтты айлат ӑвет па пухӑт Денис Речкин пидӑ тӑдан хӑтл тӑса па тӱнширӑна хӱр вӱты вӑндтӑйлсӑт. Нӑмӑслӱв, хуты тӑм ӑмӑнхӑтл олаӑн нявремӑт шеӑк ӑмӑша хӑншлӑт па мет яма вӱюм хӱрӑт мира вандтӑлӑт.

Ирина САМСОНОВА

Арсыр яснэтн хэншты вер оланэн

Мэнуи тэлаш 16-17-мит хэтлэнэн Сыктыв-кар вошн «Электронная письменность народов Российской Федерации: опыт, проблемы и перспективы» немпи мирхот мэнас. Шив Россия мыв хэс тэхи эвэлт па яртэя па хон пелэк мыв эвэлт мир актэшийдсэ, шит Германия, Финляндия, Испания, Венгрия, Эстония па па мывэ.

Юхтум мир путэртсэ, хутыса арсыр мирэнт яснэтн электронной хэншты вер лэштэман вэл. Коми мыв кэща лэцкар не **Лариса Максимова** вуща ясэ моён эха лупэс. «Тэмхэтл рэт ясэ – шит мир йис вэлупсы, культура па этнос. Мосл шиты верты, лэцн кашэ ясэ электронно йис па мывтел мира вантты шира вэс. Сэран мывевн коми ясэ электронной хэншты вер вула вера вэл. Шиты мыв рэт ясэ вэс лэвлэв па елды тэлув. Коми республиканской академиян вет мултас ол мэс «Центр инновационных языковых технологий» тэхи рэпитл. Ши тэхи эх ясэв электронной шира верты пэты ар мосты вер тэлат», – лупэс Лариса Владимировна.

Оланмит пыв ши мирхот 2011-мит олн Йошкар-Ола вошн вэс. Шит верды, лэцн Россия мыв арсыр мирэнт хэншты вер лавэлты па нух алумты. Мирхота юхэтсэ ши эх, хуйтат рэт ясэц нух алумты лэцхалэ, шит нывремэнт вэлтэты эх, яснэт дерамтты хуятэ, оса тэхетн рэпитты хэннехэйт. Коми мыв Государственной Совет кэща не **Надежда Дорофеева** лупэс: «Тэмхэтл Интернет па компьютер вула вэллэ. Интэм аршэк хэннехэ киникайт, справочникэ, словарят планшетэнт па компьюте-

рэтн лэцэтлэ, непекаэн – шимэлшэк. Шит пэты тэм мирхот вэн унтас тэл. Электронной ширн кашэ хэннехэ па мыв ясэ вэлтэты шир тэйд. Республиканской академиян рэпитты эх «Национальный корпус коми языка» немпи электронной система лэштэсэ, шит мет мосты ут, шэта арсыр верэ оланэн рэт ясээн уша павэтты рэхл».

Мосл лупты, иса рэт мирэнт кутн коми ясээн электронной ширн аршэк мосты вер версы. Россия мыв Федерация Советн рэпитты хэ **Валерий Марков** лупэс, хуты ар ол мэнас ши выв эвэлт, хэн лэв пухэл институтн вэлтэйдман оланмит коми буквайт клавиатура верэс. Тэп эн ванты коми ясээн клавиатура мировой стандарта эн йис. Шит пэты ши вер эхтын ар рэпитты мосл. Валерий Петрович лупэс: «Маширемн, рэт ясээн непекаэн хэншты вер иши вула вэл. Йис пурэйн хэншум киникайт эн ванты лэцэтлэйт. Шитэв эвэлт мыв уша павэтлэв, ши пурэйн эх муй верман вэсэ. Эн нывремэнт энмэлтман имухты цифровой мира лулэ. Шит пэты информационной вер нух алумты мосл».

«Федеральный институт развития образования» тэхийн рэпитты не **Ольга Артеменко** лупэс, Россия мывн 270 мултас ясэ

па путрупсы вэл, шитэ яма лавэлты мосл. Лэв лупэс: «Яснэ лавэлман электронной технологият мет вула верты эн мосл. Па ширн яснэ лавэлты иши мосл. Ашколайн нывремэнт рэт ясэ вэлтэты вер елды тэты мосл. Вантэ, рэт ясэ – шит хэннехэ нумэсн тэйтэ ясэ». Мирхотн уша павэтсум, рэт ясэ яма лавэлты шира па яснэт эвэлт юхтум яснэт мосл рэт ясэ тэса тулмаштэты.

Удмуртия мывн вэлты не **Елена Петрова** мирхотн ясэ тэс, хутыса Интернетн удмуртской ясэ эвэлт рыв ясэ тулмаштэты рэхл. Ши ут тэла вэл: translate.yandex.ru. Тэп ши ут путрэт юврая тулмаштэл. Ши юпийн путэр мосл яма лэцэтты па ямашэк верты. Ши ныв иса яснэт эвэлт тулмаштэты верн вэл. Шэлта лыв йилпа тывум ясэуп электронной словарь тэйдэ, иса яснэтн шимэлшэ утэ лэштэты мосл. Удмуртской ясээн айдат эх Вконтакте соцсеть хуши «Удмуртлык» тэхи пүншэ па шэта кутэлн тэп рэт ясээн путэртлэ. Тэп и ныв вэл, мир путэртман ар рыв ясэ шэта хэншлэ, шит русизм нем тэйд. Мирхотн ясэ мэнас, хуты хэнты па вухалэ ясээнэнэн интернетн путэртты тэхи антэм. Шит иши лэштэты мосл.

Хэнты ясээн хэншты вер оланэн шэла Асугорской институтэн рэпитты не **Валентина Соловар** путэртэс. Лэв яснэл ширн, хэнты ясээн и хурасупа хэншты вер антэм, ши вер эхтын 1995-мит ол выв эвэлт ученой эх

рэпитлэ. Лэв лупэс, хуты тэп йилуп алфавит верты юпийн электронной ширн хэнты ясээн юврая хэншум буквайт вантэсты вер, электронной словарьт, «национальный корпус языка» ут па па верэ верты питдыт. Эн ванты хэнты ясээн шимэлшэ утэ эн тэйдэ.

Мосл лупты, хэнты ясээн киникайт па газета PT Serif шрифтан хэнты буквайт хэншлэйт. Москва вошн «ПараТайп» тэхийн рэпитты хэ **Геннадий Фридман** лупэс, хуты Россия мыв иса тэхетн арсыр мирэнта мосл и шрифтан хэншты, шит PT Sans па PT Serif утэн. Тэп ши шрифтенэн иса мирэнта буквайла хэншты мосл.

Уфа вошн «Институт истории, языка и литературы» тэхийн рэпитты хэ **Зиннур Сиразитдинов** лупэс, хуты интэм кашэ хэтл рэт ясээн хэншты хуятэ лавэрт рэпитты. Лыв пэтэла клавиатурэйн раскладка, электронной словарь, юврая хэншум яснэт электронной ширн кэншты мосл, ши верэ ар мир худна эн тэйдэ. Шит пэты мирхотн эх непекаэн хэншэ, лэцн елды Россия мывн кэща эх ши вер тэса вантман ат тэйсэ, госзадания ши вер хэншты мосл. Кашэ мывн мосл шимэлшэ тэхет пүншты, хута мир рэт ясээн электронной хэншты вер дерамтты па нух алумты питлэ. Иса университетэнт филологической факультэтэнт мосл компьютерной лингвистика ширн тэхи пүншты. Шиты мыв рэт ясэв айдат эх пэты хэйдэ.

Надежда РАГИМОВА

Нәптӑң мир олаңӑн нәмӑсман

Ай кер тыдӑш 30-митн округ правительствайн вӑлды вӑна пелка ювум ӗх верӑт вантман тӑйты комиссия ӗх мирхот верӑнтсӑт. Тӑмхӑтл хӑлум вер нух вантсы.

Округ общественной связят департамент кӑшайт уша верлӑт, муй арат вӑна пелка ювум хуятӑт пӑта поступсы олаңӑн газетаятн хӑншы, радивайн пӑтӑртсы па телевизор хуят вандтӑсы. Уша йис, тӑнял кӑт шурӑс-кем айкел тывӑс. Ширн округевн вӑлды пирӑш ӗх мосты пурайн поступсӑт олаңӑн уша верлӑт.

Ӑмвош Вудӑн Отечественной далӑн дала-

сум ӗх оса тӑхи кӑша не **Надежда Кумарова** дыв рӑпатаел олаңӑн ай тӑс. Тӑм тӑхи рӑпатнекӑт рӑпатайдал олаңӑн немасыя поступсы хӑншлӑт. Шӑлта Югра мӑвев социальной развития департамент кӑшайт вух ӗша холумты щира кӑсупсы лӑшӑтлӑт. Щиты тӑнял тӑм оса тӑхи хуятӑт хӑлум пӑш субсидия вух вӑсӑт, щит 1 500 000 шойт вух. Щи вух унтасн тӑм тӑхия лунты вӑна пелка

ювум хӑннехуятӑт нӑтдыйт, арсыр мосты верӑт, ӑмӑхӑтлӑт лӑшӑтдыйт, арсыр тӑхета тӑтылдыт. Щиты тӑнял мӑң ветеранлӑв Тверской областы янхсӑт, щӑта Бельской район Плоское кӑртӑн хӑс ола йис, хӑн увӑс солдатӑт пӑты Мемориал Славы кев хурас пӑншы.

Рӑпата верӑт тӑты департамент кӑша лӑңкӑр не **Светлана Лотова** ай тӑс, муй ширн дыв вӑна пелка ювум ӗха рӑпата вӑйтты нӑтлӑт. Щиты юхи хӑшум хӑлум ол мӑр 2511 хӑннехӑя рӑпата вӑйтты нӑтсы. Вӑна пелка ювум икет щимӑш

рӑпатайт пирилӑт: ати хотӑт лавӑлды, машинайтн янхты, хот пӑңӑлн сыстамтты, пишмайт тӑты. Имет – ай няврӑмӑт вантман тӑйты, вух лӑңӑтты, социальной рӑпата па общежитияйт вантман тӑйты рӑпатайт пирилӑт. Пирӑш ӗх пӑты йилуп рӑпатая вӑндтыйлдыт щира немасыя курсӑт лӑшӑтдыйт. Щиты 125 хуят вӑндтылдӑс. Щи тумпи 2016-мит одн вӑна пелка ювум 17 хуят субсидия вух унтасн дыв саттӑла вер пӑншы.

Людмила
ЛОНГОРТОВА

Юхи хӑшум пӑш вӑлупсы

Ай кер тыдӑшн «Хӑтл» немпи Ас-угорской театр ӗх «Последнее пришествие» немпи эвенкийской писатель Александр Латкинӑн хӑншум пӑтӑр хуят етнхот вандтӑсӑт. Округ дума шуши мир ассамблея кӑша хӑ Еремей Айпин тӑм пӑтӑр хуят етнхот вергы партӑс. Тӑм етнхот Анна-Ксения Вишневская верӑс.

«Последнее пришествие» – щит вӑн хуятӑт вантты пӑты, вантӑ, щӑта 1980-мит олатн лавӑрт вӑлупсы олаңӑн етнхот. Эвенкийской Василь-

евӑт хоттел ӗх (Илья пирӑш ики, лӑв Василий хилӑл, щӑлта Василий хоттел ӗх – щит Устинья ими, Александр вӑн пух, Ариша эви па мет ай хӑлум ол лӑват Илья пухие) йис ширн вӑлды таш лавӑлман вӑлдӑт. Ипӑш кӑртӑн кӑша Арги «Шут-Палач» Василия партӑс, лӑлн дыв касӑлдыт вӑлупсы ат вушкӑсӑт, кӑрта вӑлды ат юхӑтсӑт па колхозӑн рӑпитты ат питсӑт. Вӑнтӑн вӑлды шуши ӗха лавӑрт йилуп ширн кӑртӑн вӑлды, дыв ӑн веритлӑт вӑлдылӑл так-ды вӑлды. Щит пӑты елды Васильевӑт хотн верӑт юврая мӑнты питсӑт, ванкӑтды лӑвӑтты, атма вӑлды питсӑт. Ипӑш дыв инумса юхӑтсӑт – ипӑ-ляң ияха сурма питты. Мосл лупты, тӑм пура вӑнты арсыр учӑныйт



Васильевӑт хоттел ӗх

уша верлӑт, муй пӑты Увӑс мӑвн шуши хуятӑт итӑх пурайн тӑлаң хоттел ӗх пилӑ ӑнтӑма йилӑт.

Етнхотн ямсыева вандтӑсы, муй ширн эвенкийской вӑдең ӗх нюки хотн вӑлдӑт. Щи тумпи ямсыева Васильевӑт кашӑн хуят хурас олаңӑн вандтӑсы, лӑлн уша вергы, муй пӑты дыв щи пӑлтап нумса юхӑтсӑт. Вантӑ, дыв кӑтӑлн щикем лавӑрта вӑсӑт. Етнхот вантсум па нәмӑсум, ӑшавӑл пушкан щи ӑсӑлды, щиты щи тывӑс.

Тӑм пура вӑнты Увӑс мир шуши хуятӑт тӑм йис ширн вӑлды ӑн лӑңхалӑт. Вантӑ, дыв йис вӑлупсыйн вӑлды шеңк лӑңхалӑт. Тӑп советской лӑш пурайн кӑшайт щиты версӑт, лӑлн увӑс мирӑт иса советской мир иты кӑртӑн, вошӑтн ат вӑсӑт.

Ма щиремн, «Последнее пришествие» етнхот – щит ӑнтӑ тӑп мӑң увӑс мирев вӑлупсы олаңӑн, щит иса Россия мӑвев олаңӑн, хута юхи хӑшум олатн ай кӑртӑт лӑп тӑхӑрдыйт.

Людмила СПИРЯКОВА

Вӑлды лавӑлды йоха

Вӑлды хӑтла щи йил,
Нӑрмӑт, йохмӑт

хуят

Ташӑв тӑйӑм мирӑв
Воша кӑсӑпсыйа йил.
Йӑр, хурасӑң хоптӑт
Мӑңӑв ӑмӑш тӑдӑт,
Мӑвӑв-автӑв

нӑмпийӑн

Лӑтӑң сый ӑн хӑрлӑ.
Нӑхӑн-йунтӑн кӑтӑн
Пухӑт тыншӑн тӑхлӑт,
Хӑншӑн сӑхӑп ӑвт
Потӑм нухи тӑдӑт.
Апрӑң йошӑп мирӑв
Йӑм нумӑсӑн ат вӑл.

Валентина СОЛОВАР

Хэс од юхды «Тэрүм дор» давадты тәхи тывас

Ай кер тыдәш 23-митн Нуви сәнхум вошн научной мирхот вәс, хута мұвев давадты тәхет олаңан пұтартсы. Шив сот мултас арсыр учёныйт, мұв-йиңк давадты тәхетн рәпитты ёх, көщайт юхтыйдсәт.

Округ көща ләнкәр хә **Алексей Забозлаев** вұща верман лупас: «Тэрүм дор» тәхийн вәдты мир па питы вуй вұты ёх күтәдн яма вәдләт. Шуши мир ямсыева вантләт, дәдн питы вуй шак-пака ат вұсы. Шит пәты муйкем арат од «Сургутнефтегаз» тәхи тәта рәпитл, нәмулт пурайн турпайт эвәлт питы вуй ән шәшмәс, арсыр вой аршәка йис».

Нуви сәнхум район көща хә **Сергей Маненков** мойн ёха тәм увас мұв олаңан ай тәс. Шит юпийн арсыр учёныйт, мұвәт давадты рәпата тәты ёх научной непеклад лұңәтсәт.

Биологической наукайт доктор хә **Станислав Арефьев** путрәд лұңәтсәд, муй ширн «Тэрүм дор» парк тывас. XX-мит нәпәт олңитум пурайн А.А. Дунин-Горкавич тәм тәхи олаңан уша верәс, дұв хәлүм пұш тыв юхтыдәс. Тәп округ поступсы хұват тәм тәхи Ас хәдты тыдәш 28-митн 1997-мит одн тывас. «Тэрүм дор» тәхи 556 664 гектар мұвн вәд. Муй тәта әмәш? Тәта ипудяң



«Тэрүм дор» тәхийн рәпитты ёх

Л. Спирикова вәсрүм хур

хәлүмсыр мұв вәд, шит вәнт, вәнт-нәрум па нәрум. Тәта Тэрүм дор вәд, шит Тюменской область хуца мет вән дор – 56 квадратной километра, шит эвәлт Натаң юхан йил. Шит Югра па Ямал хәнтәт па юрнәт пәты емаң тәхи. Тыв мир Нум Тәрума пойкшәты юхтыйдләт. Тәм тәхи пұңәдн 250 мултас Касум хәнты па юрн хуят вәд, дыв вұды тащәт давадләт, вой-хұл ведпәсләдәт.

«Тэрүм дор» природной парк хуца 28 вой, емаң вой па сусл вәдләт. Тәм тәхи мухты мортты мұв эвәлт увас пелка 160-сыр тухләң вой пәрләд, шит эвәлт 30 тухләң вой Вурты непека хәншман вәд. Шит тумпи тәта 197-сыр турн енмәл, 12 турн ищи давадман тайды. Научной непек лұңәтмәдн С.П. Арефьев «Тэрүм дор» парк олаңан дерамтты учёной

немәт нәмәдмәс: В.М. Морозов, Ю.И. Гордеев, П.С. Ситников, С.Ю. Лаврентьев па па хуятәт.

Тәмхәтд ар учёной хуят «Тэрүм дор» парк олаңан научной непек лұңәтсәт. Дыв ясәңдәд эвәлт уша йис, хуты хәнтәт па юрнәт дыведа мет яма нәтсәт. Мосд ястәты, хуты тәм парк хуца ар шуши хуят рәпитл.

Шит тумпи па ёх дыв природной паркәд, заповедникләд олаңан айкеләт тәсәт. «Кондинские озёра», «Сибирские увалы» па па паркәт хуца рәпитты научной рәпатнекәт ай тәсәт, муй ширн дыв хуцәда экотуризм вер ләшәтман вәд.

Мұв илпи питы вуй, газ вұты ёх пұтәртсәт, муй ширн дыв шак-пака питы вуй па газ вұдәт па шуши мир пида кашашты непек хұват рәпитләт. «Сургутнефтегаз» тәхийн рәпитты не **Любовь Малышкина** лупас, «Тэрүм дор» тәхийн тәм йисн питы вуй вұды. Тәняд дыв компанияд көщайт Тэрүмдор карт пәты 35 миллион шойт

вух мәсәт. Шит вух унтасн щәта йилуп хотәт, кұлуп, «Визит-центр» па Тэрүм емаң хот омәссы. Ешавәд щәта йиңк сыстамтты ут омәсды па нуви тұт карты кел талды, ин, вантә, тәп вет щос мәр нуви тұт мәды. Шит компаниян 70 хәнты па юрн хуят рәпитл.

«Тэрүм дор» тәхи инспектор хә **Василий Пяк** лупас, шит компания ёх зонирование версәт, шит юпийн тәд еңк әш вана йис, ин шуши хуятәт сорашәк па кәртәта муй вошәта яңхты веритләт.

Шит научной мирхот юпийн непек етл.

Мирхот сухнум юпийн «Тэрүм дор» тәхийн рәпитты ёх ишәкты непекәт ёша холумсәт. Шит хуятәт күтн хәнтәт па юрнәт ищи вәсәт: Сергей Рындымов, Василий Геннадьевич Пяк, Валерий Пяк, Василий Владимирович Пяк, Геннадий Рандымов, Данил Спиридонов, Александр Молданов, Тихон Тарлин, Наталья Вылла па Пётр Пяк.

Людмила ШУЛЬГИНА

ВЕЯТН ШИ ОЛАҢАҢ

Россиян сот од юхды заповедникәт тывсәт. Тәм 2017 од – шит мұвев-йиңкев давадты од. Шит тумпи 2017-мит од – шит экология од.

– Ма аҥа лыпӑт шу-
вие омӑссум па нӑ-
мӑслум: «Вӑна енмӑд
ки, Деомид яем ладь
эвӑлт юхды кердӑл».
Аҥа лыптем вӑна йис,
тӑп яем юхи аҥ юхтӑс,
– пугӑртӑл Зоя Павлов-
на Попова.

Ладь хӑрн кимит яйд
ищи вӑс, лӑв тӑп 18 тӑда
йис, имухты армияя
тӑсы. Лӑв немасья кур-
сӑт етшугтӑс па млад-
ший лейтенант нем
тӑйс. Ладь хӑрн мӑшмӑд-
тӑйылды, госпитальн
удӑс, ямӑдтылдӑс па па
щи дала тӑсы.

Вудаҥ Отечественной
ладь пугайн мира иса
давӑрт вӑдты вӑс. Юдн
ййдал такды ищи давӑрт
вӑс. Упидал леспромхоза
рӑпитты муй Поднавта
китсыйт. 1941-мит олн
Асн йиҥк шеҥк вӑн вӑс,
щит пӑта колхоз ми-
сӑт Поднавӑт кӑрта
тӑсыйт. Юдн аҥкеда-
ащеда нӑтты ай Зоя хӑ-
щӑс. Упидал яйӑдала
Деомид па Михаила
пишма хӑншӑс. Зоя
хӑншты аҥ хошӑс,
ӑшколая тӑп 1943-мит
олн мӑнӑс, щи пугайн
лӑв 12 тӑда йис.

Ладь пугайн дӑмӑтсук
шеҥк аҥтӑм вӑс, щи
пӑта лӑв ащеда ӑшкола
пӑта нираҥ ӑнтсы. Щи
давӑрт пугайн немхуят
аҥ нӑмӑсӑс, яма муй
атма дӑмӑтдугман вӑд.
Нявремӑт вӑн хуятӑта
нӑтсӑт, муй верты парт-
сыйт, щит версӑт.

Лыв Шӑншвош кӑр-
тӑн интернатн вӑ-
сӑт, вӑндтӑйлсӑт, рӑ-
питсӑт. Лӑҥӑн ошн
рӑпитсӑт: мисӑт пӑссӑт,
мисхотн нащам йира
вӑсӑт, турн сӑвӑрсӑт.
Айлат ӑх учителӑт пида
вӑнта яҥхсӑт, ӑшкола
па интернат пӑта тӑт-
юх ӑкӑтсӑт. Тӑдн щи
тӑтӑюхӑтн кӑрӑт ӑлсыйт,
тарум ишкӑ пугайн аҥ
вӑндтӑйлсӑт. Щи артӑн
хӑншты юх па непек аҥ



З.П. Попова



Зоя 12 тӑд дуват

Саккараҥ шепты путалӑт

тӑрмӑс. Итӑх пугайн
газета лисн хӑншӑт,
чернила юкана па кӑр
хиш марганцовка пида
дылдӑтсӑт.

Ашколая пӑнӑн кӑр-
шка па нялы тӑтӑлясӑт,
щӑта дыв картӑпка
эвӑлт кавӑртум лантӑн
лапӑтсыйт. Интернатн
лантӑн, нянӑн, еша
саккарн мийдысыйт. Щи
саккар итӑх хуятӑт
нянӑ пида десӑт, хуйтат
па шая есӑлсӑт. Итӑх
пушхӑт па саккар яха
ӑкӑтсӑт, ӑхӑт па ай карты
пӑтн кӑр ӑхтӑйн мав
версӑт. Воспитателӑт
вӑйтсӑт, хути нявремӑт
еплӑҥ ут леты дӑҥхалӑт,
щит пӑта мав верты
есӑлсыйт. Пушхӑт пӑта
щит мет еплӑҥ мавӑт
вӑсӑт.

Интернатн вӑдман
нявремӑт шеҥк юхи
дӑҥхасӑт. Ипӑш рӑт-
щӑты хӑтлӑн Ас потты
тылдӑш 7-митн, ӑвет-
пугӑт юхи аҥкидал-
ащидал хуши мӑнты
сонтумӑсӑт. Шӑншвош
пӑҥӑлн Ас потсы, па
пелӑкн па худна сӑлӑк
еҥк нӑпӑтсы. Мудты
щирн нявремӑт Ас па
пелка вушсӑт. Сооткурт
па Лохтоткурт вӑнты 18
километра мӑнты хӑшӑс,
ешавӑд юхи щи юхӑтлӑт.
Интернат кӑща неӑн
ӑхӑт така дӑвӑлдӑсыйт,
и амӑт тӑп – юхи яҥхсӑт.

Юхды педа па кӑртӑн
икетн тӑсыйт, даюм па
кел пӑнӑн тӑтӑлясӑт.

Интернатн нявремӑт
давӑлды неӑт эвӑлт
Александра Павловна
Коржова мет яма нумса
питӑс, нявремӑт педа
шеҥк нявлак па сӑмӑн
ими вӑс. Лӑв ӑвет хӑн-
ши ӑнтты вӑндтӑс.
Итӑх пугайн Зоя Алек-
сандра Павловна хуши
мойҥа яҥхӑс, еплӑҥ де-
тутн лапӑтсы. Васы няр
караҥ пушах ана сеҥк-
ты, саккарн пунты, яха
рӑвӑтты, няня хонтман
щи мурта еплӑҥ ут питӑ.
Щимӑш щи амтупсӑт
ладь пугайн нявремӑт
тӑйсӑт.

Хӑн Зоя ай вӑс, Лох-
тоткурт не Валя Ли-
хачӑва иты тынесты
неӑа йиты дӑҥхас.
Хӑн ӑшкола етшугтӑс,
ӑмвоша учителя вӑнд-
тӑйдты китсы. Щиты
щи Зоя Павловна ай
нявремӑт вӑндтӑты
неӑа йис. Лӑв шеҥк
дӑҥхас рӑт мӑвда юхды
кердӑты, тӑп Сӑмӑт-
вош района Поднавӑт
кӑрта китсы. Щӑта лӑв
интернатн нявремӑт
давӑлды неӑа рӑпит-
ты питӑс. Щи пугайн
щӑта 111-кем хуят вӑс.
Щи юпийн Касумн,
Сартынья кӑртӑн рӑ-
питӑс. Араттедн Сӑ-
мӑт вош районӑн

яртӑяҥкем ол вӑс. Тӑп
1963-мит олн Шӑншвош
кӑртӑда кердӑс. Олӑдн
интернатн, щӑлта па
1967-мит ол вӑш эвӑлт
ай нявремӑт вӑндтӑс.
Пушхӑт пида ӑмӑш
рӑпитты вӑс. Ешавӑс
Шӑншвош ӑшколайн
нулевой класс версы,
щив хӑт тӑд дуват
нявремӑт вӑсыйт. Дыв
лӑҥӑтты па хӑншты вер
уша павӑтсӑт, арсыр
стихӑт вӑндтӑсӑт. Итӑх
хуятӑт интӑм вӑнты
щитӑт нӑмлдӑт.

Ашколайн ай классӑтн
хӑнты ясӑҥ па вӑндтӑсы,
щи урок Зоя Павловна
тӑс. Тӑп хӑнты ясӑҥ аҥ
вӑйтты нявремӑт пи-
да шеҥк давӑрт ясӑҥ
вӑндтӑты вӑс. Щит пӑта
тӑмӑш урок нух вӑсы,
етнӑтн тӑп верӑнтсы.

Зоя Павловна учителя
34 тӑд рӑпитӑс, 25 тӑд
Шӑншвош ӑшколайн.
2016-мит олн ван хӑтлуп
тылдӑшн лӑв 85 ода йис.
Тӑм вӑнты худыева
вӑндтум нявремдӑд
нӑмлдӑд. Лӑҥӑн хӑр ошн
кӑпӑртӑл, сыр-сыр дety
путалӑт енмӑдтӑд. Тӑ-
даҥ ӑш, тӑдаҥ кӑр, хӑв
йис-нӑпӑт елды ат вӑд.

**Наталья КРЮКОВА,
Шӑншвош кӑрт**

**Хӑнты ясӑҥа тулмашӑс
Надежда ИЛЫНА**

Вэнт давадман тайты мосл


Округевн Нуви сәң-хум район па районәт киньши эхәтшәк тывәс. Щәта хәс мултас ол юхды мұв-ават па вой-хұд давадты кеша «Сорумский» заказник версы. Щи тахи Ёмвош округевн шимәщ тахет кұтн мет вәна лұнтәсд. Сорум кәрт эвәлт кев пеләк педаяң километра вұшн вәд, 159 300 гектар мұв тайл.

Щәта рәпитты хуятәт кашәң хәтл вэнт хұват шәшләт па вантләт, ләдн немудты вевтам вер ал тывәс. Лыв ванкұтды нух хәншләт, муй арат вэнт па тұхлән вой: пұпи, кұтари щәта вәд па па вэнт войт, мәта утәт округев «Вурты киникая» хәншман вәдләт. Тәмхәтл щәта мет ар педна па нямәлт деты бурозубка вой вәд, ай войт эвәлт вурты полевка, вэнт войт эвәлт – нюхәс, лаңки, шовәр, пұпи па кұрәң вой.

Тұхлән войт кұтн – хәр вэнт тухлән вой мет ар питл. Округ «Вурты киникайн» хәлүм тұхлән вой хәншман вәд, щит нуви дывәң кұрәк, скопа, кобчик немуп войт.

Юхи хәшүм 16 ол мәр сыр-сыр вэнт вой кәт пұша шимла йис. Ара тәп нюхәс, пұпи па шовәр йис. Тәп «Сорумский» заказник мұхты газопровод, нефтепровод па машинайт яңхты эш пунман вәдләт. Щит мұв-ават па вой-хұд пәты шәк тәд. Тәта рәпитты хуятәт ванкұтды щи тахет нух вантләт, ләдн мулты атум вер ал тывәс. Ләдн вой-хұд ара ат йис, лыв немася ләшәтүм тахета суд пунләт, тыхләт верләт.

Щәта арсыр юхәт, нәршәт, турн-варсәт енумләт. Иса араттыйн



«Гвардеец» рұтыщаты тахи



Лұк



Рәпитты хә войт пәта суд пунл

150-кем арсыр енумты ут, няд – Тюменской область па Ёмвош округ «вурты киникая» хәншман вәдләт. Щит пальчатокоренник гибридный, кубышка малая, лютик лапландский, гвоздика пышная.

«Сорумский» заказникән научной рәпата па тәды, щит мосты па вудаң вера вәд. Лыв сыр-сыр верәт олаңән хәншләт, муйсәр тәрум вәс, муй ширн турн-варсәт, юхәт, войт енумләт.

Ищиты дыв айлат эх пидә рәпитләт, арсыр вәйтәнтупсәт, вантупсәт, кәсупсәт, етнхотәт па па верәт верәнтләт. Щи тумпи заповедникән рәпитты хуятәт мосты непекәт есәлдәт, ләдн мир ат лұнәтсәт, муй ширн мұвәт-йиңкәт давадман тайты мосл.

Айкемн туристической вер ләшәтты питсәт. Лұнән Сорум кәрт ашкола нявремәт пәта «Гвардеец» немпи рұтыщаты тахи верәнтды. Щәта айлат эх

вәндтәдыйт, муй ширн вәнтән вәдты па вэнт шушет давадман тайты мосл.

Щиты заказникән рәпитты эх вэнт давадман тайләт па мир вәндтәләт вәнтән тұңширәңа вәдты па ләваса мұвев-йиңкев ал шәкәлды.

БУ «Объединённая дирекция особо охраняемых природных территорий» тахи айкел

Ханты ясаңа тулмаштәс Надежда ВАХ



Я. Тарлин тумран верл

Ю. Баткина дүв эвэлт
хурас эвэлтС. Кечимов аңтуп
посат нюхәрл

Л. Спирыкова верум хурат

Дүвәт эвәлт арсыр пурмәсәт версыйт

Ай кер тыдәш 13-17-митн «Торум Маа» музей хуца вой дүвәт эвәлт арсыр пурмәсәт верты оләңән XIX-мит научно-практической мирхот вәс.

Тыв Ёмвошәң верәнтты ёх тумпи Касум, Русскинской па Тәпад вош эвәлт сорни ёшпи хуятәт юхтыйдсәт. «Торум Маа» музей кәча не **Людмила Алфёрова** вўща верман лупәс, тәм йисн мет вудаң вер – щит шуши мир йис верәта айләт ёх вәндтәты мосл.

Мет сыры йис вәлупсы дерамтты ёх научной непекәт дүңәтсәт. Искусствовед не **Наталья Фёдорова** ай тәс, хуты йистелн икет аңтуп хурамәңа верләт, тәп ши вер оләңән ищи яма вәты мосл. Йис вәлупсы дерамтты не **Татьяна Молданова** путрәл дүңтәс, мәта пура вўш эвәлт мўң мирев аңтуп тайты питсәт. Аңтуп 7-мит нәпәт йис вўш эвәлт йилуп нәпәт вәнты тывәс. Икет пәты аңтуп – щит тәм йисн ладь ёх погонәт хурпи, щит әр-кәс.

Йис вәлупсы дерамтты хә **Тимофей Молданов** арсыр аңтупәт оләңән ай тәс. Щимәш аңтупәт вәлләт: ләңх аңтуп, вәлпәс аңтуп, няврем аңтуп па па арсыр аңтупәт. Хәнтәт лупләт, хә хуят аңтуп таклы яңхәд ки, дүв эвәлдәда уй йира мәнд. Ики

аңтуп вәшәс ки, немхуят дүвәда аң эвәл. Вет-хәт од вәнты пух юнтуп хурпи кеши па аңтуп тайс, щәдта еша вәншәка йил па вән хуят иты кешийн мәсы. Тәп рәт хуята аңтуп мойләты рәхл.

Тәпад вош историко-архитектурной музей-заповедник рәпатнек Юлия Баткина дүвәт эвәлт верум пурмәсәт тәс, мирхота юхтум ёха щитәт вантты шеңк әмәш вәс. «Торум Маа» музейн рәпитты айләт не Дарья Татаринова намәт ёнтты вер па дон эвәлт сух верты оләңән путәр дүңтәс.

Етн «Кешет па аңтупәт» немпи ванлдупсы вәс.

Кимит хәтлән верәнтты ёх дүвәт эвәлт арсыр пурмәсәт верты вәндтәсәт. Ма верәнтты хуятәт пида путәртсум.

Юлия Баткина:

– Ма Тәпад вош эвәлт юхәтсум. Ма ащем щирн хәнты не. Ма айтелн хур хәншты вер сәмәңа тайлум. Щит пәты Д.И. Менделеев немпи пединститутн ши вера вәндтәйдсум. Ин ма юдн дүвәт эвәлт арсыр пурмәсәт, ай кев

хурасәт верлум па интернет мухты тынылдам. Ма вельщи щимәш мирхота юхәтсум, вән пәмәщипа тыв вохмем пәты.

Сергей Кечимов:

– Ма Сәрханл район вўт кәрт эвәлт юхәтсум. Ма тыв дүв нюхәрти пурмәс тәсум, ин айләт ёх аңтуп пәты дүвәң ента путалые верты вәндтәлүм. Ма ши вера ащем эвәлт вәндтәйдсум.

Яков Тарлин:

– Тәмхәтл ма тумран нарэсью верты вәндтәты питлүм, ши вера ма Ксения Григорьевна Ерныхова эвәлт вәндтәйдсум. Щит ямсыева мосл кавәртты, щәдта сорәлты, ши юпийн тәп тумран верты. Тумран ищимурт сора верты, тәп хўв щив сыйл пунты мосл.

Данил Покачев:

– Ма Тром-Аган эвәлт юхәтсум. Вўт кәртемм сот мулдас вўды тайлум. Айтелн ма ащем вал оңты па похәл верты вәндтәсыном. Тәмхәтл дүв эвәлт вал похәд верты вәндтәты питлүм. Ма кимит пўш щимәш мирхотн, тәняд Сәрханл вошн вәсум.

Елды па газетайн дүңтәты, муй щирн тәм мирхот сухнәс.

Людмила СПИРЯКОВА

Ханты ясанг
(Хантыйское слово)
№7 (3475), 06.04.2017

Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция

Главный редактор –
Решетникова Р.Г.
Телефон (3467) 33-36-82

Заместитель главного
редактора – **Вах Н.И.**
Телефон (3467) 33-24-02

Ответственный секретарь –
Рагимова Н.В.
Телефон (3467) 33-24-02

Адрес редакции и издателя:

628011, г. Ханты-Мансийск,
ул. Комсомольская, 31
тел./факс (3467) 33-17-52

E-mail: gazeta@khanty-yasang.ru
Газета размещена на сайте
www.khanty-yasang.ru

Отпечатано:
ООО «Новости Югры-
Производство» г. Сургут,
ул. Маяковского, 14.

Подписано в печать:

по графику 06.04.2017 г.
в 9.00.; фактически
06.04.2017 г. в 9.00.
Индексы **04393, 54393**
Тираж **2210** экз. Заказ **179**
Цена свободная

Газета зарегистрирована
Управлением Федеральной
службы по надзору в сфере
связи, информационных

технологий и массовых
коммуникаций по
Тюменской области, ХМАО-
Югре и ЯНАО. Свидетельство
о регистрации ПИ №ТУ 72-
00796 от 23 января 2013 г.

Мнение авторов
публикаций не
обязательно отражает
точку зрения
редакции.